

四庫全書薈要

• 乾隆御覽本

史部

欽定四庫全書薈要

史部

元史紀事本末卷三



元史紀事本末卷三

明 陳邦瞻 撰

諸儒出處學問之槩

至元十八年三月許衡卒衡自辭國子祭酒歸懷

孟至是病革家人祀先衡曰吾一日未死敢不躬祀扶而起奠獻如儀既徹家人餞怡怡如也已而卒年七十三懷人無貴賤少長皆哭于其門四方學士大夫聞訃



皆為位而哭衡嘗語其子曰我平生為虛名所累竟不能辭官死後慎勿請諡勿立碑但書許某之墓四字使子孫識其處足矣後贈司徒封魏國公諡文正虞集曰南北未一許衡先得朱子之書伏讀而深信之持其說以事世祖儒者之道不廢衡實啟之

衡學問始末與姚樞實熟趙復等出

虞俱附
見宋編

十九年十二月徵處士劉因因字夢吉容城人天資絕人日記數千言過目成誦初為經學究訓詁注釋之說

嘆曰聖人精義殆不止此及得周邵程朱之書一見即
曰我固謂當有是也及論其學之所長曰邵至大也周
至精也程至正也朱子極其大盡其精而貫之以正也
愛諸葛孔明靜以修身之語表所居曰靜修至是以博
果密薦詔徵之擢右贊善大夫尋以繼母老辭歸俸給
一無所受後復以集賢學士徵因上宰相書力辭帝聞
之曰古有所謂不召之臣其斯人之徒歟遂不强三十
年卒于家

成宗大德七年夏四月蘭谿處士金履祥卒履祥字吉父幼敏睿及長從學同郡王栢及何基之門基則學于黃榦而榦則親得朱熹之傳者宋將亡遂絕意進取屏居金華山中訓迪後學諄切無倦及何基王栢之喪履祥率其同門之士以義制服觀者始知師弟之繫于彝倫也履祥嘗謂司馬文正公作資治通鑑劉恕為外紀以記前事不本于經而信百家之說是非謬于聖人不足以傳信乃用邵氏皇極經世歷胡氏皇王大紀之例

損益折衷一以尚書為主下及詩禮春秋旁採舊史諸
子表年繫事斷自唐堯以下接于通鑑之前勒為一書
名曰通鑑前編以授門人許謙曰二帝三王之盛其微
言懿行宜後王所當法戰國申商之術其苛法亂政亦
後王所當戒則是編不可以不著也謙嘗序其論孟考
證曰聖賢之心盡在四書而四書之義備於朱子願其
立言詞約意廣讀者咸得其粗而不能悉究其義或以
一偏之致自異而初不知未離其範圍世之詆訾貿亂

務為新奇者其弊正在此耳此金先生考證之所由作也始余三四讀自以為瞭然已而不能無惑久若有得覺其意初不與己異愈久而所得愈深與己意合者亦大異於初矣童而習之白首不知其要領者何限其可以易心求之哉當時以基之清介純實似尹和靖相之高明剛正似謝上蔡履祥則親得之二氏而並克於己者也居仁山之下學者稱為仁山先生

十二年十二月徵處士蕭軒為太子諭德軒字惟斗陝

西奉元人初出為府史與上官語不合即引退讀書南山者三十年不求進取博極羣書及門受業者甚衆鄉人有暮行遇盜詭曰我蕭先生也盜驚愕釋去世祖時辟為陝西儒學提舉不赴後累授集賢直學士國子司業改集賢侍讀學士俱不赴至是徵拜太子右諭德扶病至京師入覲東宮書酒誥為獻以朝廷時尚酒故也尋以病請解職或問之則曰禮東宮東面師傅西面此禮今可行乎俄擢集賢直學士國子祭酒依前右諭德

固辭而歸卒諡貞敏同時有韓擇字從善侯均字伯仁
同恕字寬甫恕弟子第五居仁字士安皆奉元人以學
行名振關中學者宗之

文宗天歷二年春正月贈緱山處士杜瑛為翰林院學
士諡文獻瑛字文玉其先霸州信安人亡金時避地河
南緱山中搜訪諸書盡讀之世祖中統初詔徵為懷孟
提舉學校官不赴杜門著書優游道藝以終其身所著
書曰春秋地里原委十卷語孟旁通八卷皇極引用八

卷皇極疑事四卷極學十卷律呂律厯禮樂雜志三十

卷文集十卷其於律則究其始研其義長短清濁周徑
積實各以類分取經史之說以實之而折衷其是非於
厯則謂造厯者皆從十一月甲子朔夜半冬至為厯元
獨邵子以為天開於子取日甲月子星甲辰子為元會
運世之數無朔虛無閏餘率以三百六十為歲而天地
之盈虛百物之消長不能出乎其中矣論閉物則曰開
於己閉於戊五天之中也六地之中也戊己月之中星

也又分卦配之紀年金之大定庚寅交小過之初六國
朝之甲寅三月二十有三日寅時交小過之九四其說
多先儒所未發云

至順二年六月吳澄卒澄字幼清撫州崇仁人自幼用
力聖賢之學嘗著說曰道之大原出於天神聖繼之堯
舜而上道之元也堯舜而下其亨也洙泗鄒魯其利也
濂洛關閔其貞也分而言之上古則羲皇其元堯舜其
亨禹湯其利文武周公其貞乎中古之統仲尼其元顏

曾其亨子思其利孟子其貞乎近古之統周子其元程
張其亨也朱子其利也孰為今日之貞乎未之有也然
則可以終無所歸哉其早以斯文自任如此宋末舉進
士不第隱居布水谷讀書著述遂不復出至元中召至
京師欲官之以母老辭歸朝廷命有司即其家錄所著
書置于國子監除江西儒學副提舉以疾去尋為翰林
學士泰定間謝病歸士大夫皆迎請執業而四方之士
不憚數千里躡履負笈來學山中者常不下千數百人

少暇即著書至將終猶不置也於易書詩春秋禮記各
有纂言盡破傳註穿鑿以發其蘊條歸紀叙精明簡潔
卓然成一家言作學基學統二篇使人知學之本與為
學之序尤有得於邵堯夫陸子靜之學校定皇極經世
書又校正老子莊子大玄經樂律及八陣圖郭璞葬書
初澄所居草屋數間程鉅夫題曰草廬故學者稱之為
草廬先生卒年八十五有大星墜其舍東北贈臨川郡
公諡文正

順帝元統二年夏四月休寧處士陳櫟卒櫟字壽翁少
有異質宋亡科舉廢櫟慨然發憤致力於聖賢之學以
朱熹氏為宗延祐初詔科舉取士櫟不欲就試有司強
之試中選遂不赴禮部教授于家不出門戶者數十年
所居堂曰定宇學者稱為定宇先生至是卒年八十三
揭傒斯志其墓與吳澄並稱曰澄居通都大邑又數登
用于朝天下學者四面而歸之故其道遠而章尊而明
櫟居萬山間與木石居而足跡未嘗出鄉里故其學必

待其書之行天下乃能知之及其行也亦莫之禦是可
謂豪傑之士矣世以為知言櫟同郡胡一桂胡炳一
桂字庭芳婺源人初德興沈貴寶受易於董夢程夢程
受朱熹之易於黃榦一桂父方平及從貴寶夢程學嘗
著易學啟蒙通釋一桂之學出於方平得朱熹氏源委
之正所著書有周易本義附錄纂疏本義啟蒙翼傳朱
子詩傳附錄纂疏並行于世學者稱雙湖先生 炳字
仲虎亦以易名家作易本義通釋而於朱熹所著四書

用力尤深餘干饒魯之學本出於朱熹而其為說多與
熹抵牾炳文深正其非作四書通凡詞異而理同者合
而一之辭同而指異者析而辨之徃徃發其未盡之蘊
東南學者因其所自號稱雲峯先生

至元三年冬十月金華處士許謙卒謙字益之父觥宋
淳祐七年進士謙少孤甫能言母陶授以孝經論語入
耳輒不忘既長遭國亡而家亦破自力於學借書於人
以四部分讀之所涉向博而有疑無所從質聞鄉先生金

履祥深明道學之要遂委已而學焉履祥告之曰吾儒之學理一而分殊理不患其不一所難者分殊耳又曰聖人之道中而已矣謙由是致其辨於分之殊而要其歸於理之一每事每物求夫中者而用之蓋自其登金氏之門即以聖賢之學為己任師弟子間口授指畫盡得其相傳之奧履祥沒謙益加充闡自得者為多於書無所不觀窮探聖微有不可通即不敢強於儒先之說所未安者亦不敢苟同也謙學於天文地理典章制度

食貨刑法字學音韻醫經數術靡不該貫一事一物可
為傳聞多識之助者必謹志之而異端之說必洞究其
蘊奧其教學者以五性人倫為本以開明心術變化氣
質為先以為己為立心之要以分別義利為處事之制
至誠諄切內外殫盡為學者師四十年部使者數列其
行義于朝郡舉茂才又舉遺逸以應詔皆固辭江湘鄉
閩嘗請持文衡亦辭不就所著述甚衆尤深於易嘗謂
伏羲之經廣大悉備文王周公孔子之詞乃其傳注六

文之義特發凡舉例耳學者稱為白雲先生後諡文懿

王禕曰堯舜禹湯文武周公相傳之道至孔子乃集
其大成宋周程氏者作復續斯道之統而道南之學
由楊時氏一再傳為羅從彥氏李侗氏至朱熹氏又
集其大成者也然孔門羣弟子惟曾氏之傳得其宗
曾氏以其所傳傳之子思子思以傳之孟子一出於
正焉朱氏之徒亦衆矣得其宗者惟黃榦氏榦傳何
基氏基傳王栢氏栢之傳為履祥為謙其授受之淵

源如御一車以行大達如執一籥以節衆音推原統緒必以四氏為朱學之正適亦何其一出於正粹然如此也程氏之道至朱氏而始明朱氏之道至金氏許氏而益著使百年以來學者有所宗鄉不為異說所遷而道術必出於一可謂有功於斯道者矣大抵儒者之功莫大於為經經者斯道之所載焉者也有功於經即其所以有功於道也金氏許氏之為經其為力至矣其於斯道謂之有功非耶

五年十二月資州處士黃澤卒澤字楚望生有異質自
少以明經學道為志好為苦思久之如有所見作顏淵
仰高鑽堅論大德中江西行省聞其名授江州景星書
院山長既久又為山長于洪州東湖書院受學者益衆
秩滿即歸閉門授徒不復言仕嘗以為去聖久遠經籍
殘闕傳注家率多附會近世儒者又各以才識求之故
議論雖多而經旨愈晦必積誠研精有所悟入然後可
以窺見聖人之本真既乃盡悟失傳之旨自言每於幽

閑寂寞顛沛流離疾病無聊之際得之及其久也則豁
然無不貫通於是六經傳注之失未決之疑凡數十年
苦思而未通者皆渙然冰釋作十翼舉要三傳義例翼
經罪言吳澄嘗觀其書以為平生所見明經士未有能
及之者謂人曰能言距楊墨者聖人之徒也楚望真其
人乎然澤雅自慎重未嘗輕與人言李洞使過九江請
北面為弟子授一經且將經紀其家澤謝之曰以君之
才何經不可明然亦不過筆授其義而已若余則於艱

苦之餘乃能有見吾非邵子不敢以二十年林下期君也洞嘆息而去或問澤自閔如此寧無不傳之懼澤曰吾道興廢上關天運豈區區人力所致門人惟新安趙沅為高第得其春秋之學為多

郭守敬授時歷

世祖至元十七年十一月甲子行授時歷先是至元初劉秉忠言大明歷自遼金承用二百餘年浸以後天宜在所立改未及用其議而秉忠沒至十三年江南畧平

天下混一上思其言遂議改修新厯立局以庀事詔郭
守敬與王恂率南北日官分掌測驗而張文謙張易領
其事前中書左丞許衡亦叅預焉守敬乃言厯之本在
於測驗而測驗之器莫先於儀表今司天渾儀宋皇祐
中汴京所造與此處天度不符比量南北二極差約四
度表石年深亦復欹側宜盡攷其失更置之及擇高塏
之所造木為重棚創簡儀高表用相比覆又以為天樞
附極而動昔人嘗展管望之未得其的作候極儀極辰

既得天體斯正作渾天象象雖形似莫適所用作玲瓏
儀以表之矩方測天之正圓莫如以圓求圓作仰儀古
有經緯結而不動改之作立運儀日有中道月有九行
合而作證理儀表高景虛其象非真作景符月雖有明
測景則難作聞凡歷法之驗在於交會作日食月食儀
天有赤道輪以當之兩極低昂標以指之作星畧定時
儀其器凡十有三又作正方按九表懸正儀凡四等為
四方行測者所用又作仰規覆矩圖異方渾蓋圖月出

出入永短圖凡五等與上諸儀互相參攷十六年改局
為太史院以恂為太史令守敬同知太史院事乃進所
造儀表式於榻前指陳理致一一周悉自朝及夕上不
為倦因奏唐開元間僧一行令南宮說測景天下其可
考者今十三處今疆宇比唐尤廣必多方測驗而後日
月交會分數時刻之不同晝夜長短之不同日月星辰
去天高下之不同可得周知上可其奏乃置監候官十
四人分道而出先從南取直立表以測景南海北極出

地二十五度夏至景在表南長一尺一寸六分晝五十
六刻夜四十四刻衡嶽北極出地二十五度夏至日在
表端無影晝五十六刻夜四十四刻岳臺北極出地三
十五度夏至景長一尺四寸八分晝六十刻夜四十刻
和林北極出地四十五度夏至景長三尺二寸四分晝
六十四刻夜三十六刻鐵勒北極出地五十五度夏至
景長五尺一分晝七十刻夜三十刻北海北極出地六
十五度夏至景長六尺七寸八分晝八十二刻夜一十

八刻繼又測驗上都北極出地四十三度少北京北極
出地四十二度強益都北極出地三十七度少登州北
極出地三十八度少高麗北極出地三十八度少西京
北極出地四十度少太原北極出地三十八度少安西
府北極出地三十四度半強興元北極出地三十三度
半強成都北極出地三十一度半強西涼州北極出地
四十度強東平北極出地三十五度太大名北極出地
三十六度南京北極出地三十四度太強陽成北極出

地三十四度太弱揚州北極出地三十三度鄂州北極
出地三十一度半吉州北極出地二十三度半雷州北
極出地二十度太瓊州北極出地十九度太十七年新
厯成守敬與諸太史同上奏曰帝王之事莫重於厯自
黃帝迎日推策帝堯以閏月定四時成歲舜在璇璣玉
衡以齊七政爰及三代厯無定法周秦之間閏餘并次
至漢造三統厯百三十年而是非始定東漢造四分厯
七十餘年而儀式方備又百三十一年紹興造乾象厯

始悟月行有遲疾又百八十年姜岌造三紀甲子歷始
悟以月食衝檢月宿度所在又五十七年何承天造元
嘉歷始悟以朔望及弦背定大小餘又六十五年祖沖
之造大明歷始悟太陽有歲差之數極星去不動處一
度餘又五十二年張子信始悟日月交道有表裏五星
有遲疾留逆又三十三年劉焯造皇極歷始悟日行有
盈縮又三十五年傅仁均造戊寅元歷頗采舊儀始用
定朔又四十六年李淳風造麟德歷以古歷章部元首

分度不齊始為總法用進朔以避晦晨月見又六十三
年僧一行造大衍歷始以朔有四大三小定九服交食
之異又九十四年徐昂造宣明歷始悟日食有氣刻時
三差又二百三十六年姚舜輔造紀元歷始悟食甚泛
餘差數以上計千一百八十二年歷經七十改其創法
者十三家自是又百七十四年惟我聖朝統一六合肇
造區夏專命臣等改治新歷臣等用創造簡儀高表憑
測到實數所攷正者凡七事一曰冬至自丙子年立冬

後依每日測到晷影逐日取對冬至前後日差同者為準得丁丑年冬至在戊戌日夜半後八刻半又定丁丑夏至得在庚子日夜半後七刻又定戊寅冬至在癸卯日夜半後三十三刻己卯冬至在戊申日夜半後五十七刻半庚辰冬至在癸丑日夜半後八十一刻半凡減大明曆十八刻遠近相符前後應準二曰歲餘自鎔宋大明曆以來凡測景驗氣得冬至時刻真數者有六用以相距各得其時合用歲餘今攷定四年相符不差

仍自宋大明壬寅年距至今日八百一十年每歲合得三百六十五日二十四刻二十五分其二十五分爲今歷歲餘合用之數三曰日躔用至元丁丑四月丁丑望月食既推求日躔得冬至日躔赤道箕宿十度黃道箕九度有時仍憑每日測到太陽躔度或憑星測月或憑月測日或徑憑星度測日立術準筭起自丁丑正月至乙卯十二月凡三年共得一百三十四事皆躔於箕與月食相符四曰月離自丁丑至今每日測到逐時太陰

行度推算變從黃道求入轉極遲極疾并平行處前後
凡十三轉計五十一事內除不的者外有三十事得大
明厯入轉後天又因考驗交食加大明厯三十刻與天
道合五曰入交自丁丑五月以來憑每日測到太陰去
極度數比擬黃道去極度得月道交於黃道共得八事
仍依日食法度推算皆有食分得入交時刻與大明厯
所差不多六曰二十八宿距度蓋自漢太初以來距度
不同互有損益大明厯則於度下餘分附以太半少皆

私意牽就未嘗實測其數今新儀皆細刻周天度分每
度為三十六分以距線代管闕宿度餘分並依實測不
以私意牽就七曰日出入晝夜刻大明歷日出入晝夜
刻皆據汴京為準其刻數與大都不同今更以本方北
極出地高下黃道出入內外度立法推求每日日出入
晝夜刻得夏至極長日出寅正二刻日入戌初二刻晝
六十二刻夜三十八刻冬至極短日出辰初二刻日入
申正二刻晝三十八刻夜六十二刻永為定式所創法

者凡五事一曰太陽盈縮用四正定氣立為升降限依
立招差求得每日行分初末極差積度比古為密二曰
月分遲疾古厯皆用二十八限今以萬分日之八百二
十分為一限凡析為三百三十六限依垛疊格差求得
轉分進退其遲疾度數逐時不同蓋前所未有三曰黃
赤道差舊法以一百一度相減相乘今依算術勾股弧
矢方圓斜直所容求到度率積差差率與天道實為昭
合四曰黃赤道內外度據余年實測內外極度二十三

度九十分以圓容方直矢接勾股為法求每日去極與
所測相符五日白道交周舊法黃道推變白道以斜求
斜今用立渾比量得月與赤道正交距春秋二正黃赤
道正交一十四度六十六分擬以為法推逐月每交二
十八宿度分於理為盡是歲有詔頒行新歷賜名授時
於是歷雖已頒而推步之式立成之數猶未有成書會
太史卒守敬乃比次篇類整齊分秒裁為推步七卷立
成二卷歷議擬稿三卷轉神選擇二卷上中下三歷註

式十二卷二十二年陞太史令遂奏上其書又為時候
箋註二卷修改源流一卷儀象法式二卷二至晷景考
二十卷五行細行考五十卷古今交食攷一卷新測二
十八舍雜坐諸星八宿去極一卷新測無名諸星一卷
月離攷一卷並藏之官古厯天周與歲周小餘同於日
度四分之一漢魏以來漸覺不齊而破分之論起守敬
乃用百年為率小餘之下增損各一以之上推往古下
驗方來無不昭合乃積年日法演積分換之說皆所不

用其為厯測驗既精設法詳具今且九十年無分毫差者舊儀悉多蔽礙且距齒有度刻而無細分以管望星漸外則所見漸展尤難取的守敬所為儀但用天常赤道四游三環三距設四游於赤道之上而附直距於四游之外與雙環兩間同結環距端測日月星則以兩線相望取其正中所當之刻之度之分之秒至為切密八尺之表夏至景長尺有五寸千里為差一寸其說見於周官周髀唐一行雖嘗疑之而未之有改守敬乃為表

比古制加五倍上施橫梁每日中以符籙夾測橫梁之景折取中數視舊法但取表端之景者加審矣

佛教之崇

世祖至元十九年帝師額琳沁死達爾瑪巴拉實哩嗣初土番人帕克斯巴相傳自其祖多爾濟以其法佐國主霸西域十餘世帕克斯巴七歲誦經數十萬言能約通其大義國人號之聖童年十五謁帝于潛邸與語大悅日見親幸中統元年帝即位尊為國師授玉印命製

蒙古新字字成上之其字僅千餘其母凡四十有一其
關紐而成字者則有韻關之法其以二合三合四合而
成字者則有語韻之法而大要則以諧聲為宗至元之
六年詔頒行天下凡璽書頒降並用蒙古新字各以國
字副之遂升號帕克斯巴曰大寶法王十一年請告西
還乃以其弟額琳沁嗣焉十六年帕克斯巴死贈皇天
之下一人之上宣文輔治大聖至德普覺真智佑國如
意大寶法王西天佛子大元帝師額琳沁嗣凡六歲至

是死復以達爾瑪巴拉實哩嗣立自是每帝師一人死必自西域取一人為嗣終元世無改焉

文宗天歷二年帝師年札克策喇實至上命朝廷一品以下咸郊迎大臣俯伏進觴帝師不為動惟國子祭酒富珠哩翀舉觴立進曰帝師釋迦之徒天下僧人師也予孔子之徒天下儒人師也請各不為禮帝師笑而起舉觴卒飲衆為之栗然按元自太祖起朔方時已崇尚釋教及得西域世祖以其地廣且險遠俗獷好鬪思

有以柔服其人乃郡縣土番之地設官分職盡領之於
帝師乃立宣政院其為使位居第二者必以僧為之帥
臣以下亦僧俗並用軍民盡屬統理於是帝師之命與
詔勅並行西土百年之間朝廷所以敬禮而尊信之者
無所不用其至雖帝后妃主皆因受戒而為之膜拜正
衙朝會百官班列而帝師亦或專席於坐隅且每帝即
位之始降詔褒護必勅章佩監絡珠為字以賜益其重
之如此其未至而迎之則中書大臣馳驛累百騎以從

所過供億送迎比至京師則勅大府假法駕半仗以為
前導詔省臺院官以及百司庶府並服銀鼠濟遜用每
歲二月八日迎佛威儀往迓且命禮部尚書郎中專督
迎接及其卒而歸葬舍利又命百官出郭饗餞大德九
年專遣平章政事特穆爾兼傳護送賻金五百兩銀千
兩幣帛萬疋鈔三千疋皇慶二年加至賻金五千兩銀
一萬五千兩錦綺雜綵共一萬七千疋雖其昆弟子姓
之往來有司亦供億無乏泰定間以帝師弟恭噶伊實

戢將至詔中書持羊酒郊勞而其兄索諾木藏布遂尚
公主封白蘭王賜金印給圓符其弟子之號司空司徒
國公佩金玉印章者前後相望為其徒者怙勢恣睢日
新月盛氣徼熏灼延于四方為害不可勝言有嘉木楊
喇勒智者世祖用為江南釋教總統發掘故宋趙氏諸
陵之在錢塘紹興者及其大臣塚墓凡一百十所戕殺
平民四人受人獻美女寶物無算且攘奪盜取財物計
金一千七百兩銀六千八百兩玉帶九玉器大小百一

十有一雜寶貝百五十有二十大珠五十兩鈔一十一萬
六千二百定田二萬三千畝私庇平民不輸公賦者二
萬三千戶他所藏匿未露者不論也又至大元年上都
開元寺西僧強市民新民訴諸留守李壁壁方詢問其
由僧已率其黨持白挺突入公府隔案引壁髮接諸地
捶朴交下拽之以歸閉諸空室久乃得脫奔訴于朝遇
赦以免二年復有僧龔柯等十八人與諸王哈喇巴爾
妃呼圖克齊德濟爭道挺妃墮車毆之且有犯上等語

事聞詔釋不問而宣政院臣方奏取旨凡民歐西僧者
截其手詈之者斷其舌時仁宗居東宮聞之亟奏寢其
令泰定二年西臺御史李昌言嘗經平涼府靜會定西
等州見西番僧佩金字圓符絡繹道途馳騎累百傳舍
至不能容則假館民舍因迫逐男子奸污女婦奉元一
路自正月至七月往返者百八十五次用馬至八百四
十餘匹較之諸王行省之使十多六七驛戶無所控訴
臺憲莫得誰何且國家之製圓符本為邊防警報之虞

僧人何事而輒佩之乞更正僧人給驛法且令臺憲得
以糾察不報必嚕匝納實哩之誅也有司籍之得其人畜
土田金銀貨貝錢幣邸舍書畫器玩以及婦人七寶裝
具價直鉅萬萬云若歲時祝釐禱祠之常號稱好事者
其目尤不一有曰辰類阿索勒華言慶讚也有曰斯滿
拉華言藥師也有曰綽克綱華言護城也有曰多爾沁
華言大施食也有曰多爾濟埒克多爾華言美妙金剛
迴遮施食也有曰齊爾多克巴華言迴遮也有曰隆科

爾華言風輪也有曰贊多爾華言作施食也有曰楚多
爾華言出水濟六道也有曰當喇克多爾華言迴遮施食
也有曰登多爾華言常川施食也有曰坐靜有曰嚕綽
華言獅子吼道場也有曰雅滿達噶華言黑獄帝主
也有曰吹思絅多爾瑪華言護江神施食也有曰齊特
古朗絅華言自受主戒也有曰辰類坐靜有曰尼古
察坐靜華言秘密坐靜也有曰札木揚華言文殊菩薩
也有曰衮布多爾華言至尊大黑神迴遮施食也有曰

赫巴匝爾華言大喜樂也有曰瓊匝雅華言無量壽也
有曰都克噶爾華言白傘蓋呪也有曰班匝喇克察華
言五護陀羅尼經也有曰阿思達薩達實哩華言八十
頌般若經也有曰薩卜爾總華言大理天神呪也有曰
科爾羅普爾普總華言大輪金剛呪也有曰策巴克默特總
華言無量壽經也有曰斯羅克巴華言最勝王經也有
曰薩斯納總華言護神呪也有曰納木卓木總華言懷
相金剛也有曰卜嚕卜巴華言呪法也又有作擦擦者

以泥作小浮屠也又有作多爾康者其作多爾康者或一所二所以至七所作操操者或十萬二十萬以至三十萬又嘗造浮屠二百一十有六實以七寶珠玉半置海畔半置水中以鎮海災延祐四年宣徽使會每歲內廷佛事所供其費以斤數者用麩四十三萬九千五百油七萬九千酥二萬一千八百七十蜜二萬七千三百自至元三十年間醮祠佛事之日僅百有三大德七年再立功德司遂增至五百有餘僧徒貪利無已交結近侍

欺昧奏請布施莽齋所需非一歲費千萬較之大德不知幾倍又每歲必因好事奏釋輕重囚徒以為福利雖大臣如阿里間師必實呼勒等莫不假是以追其誅宣政院叅議李良弼受昧鬻官直以帝師之言縱之其餘殺人之盜作奸之徒夤緣幸免者至多或取空名宣勅以為布施而任其人可謂濫矣凡此皆有開手一代之治體者故今備著焉若夫天下寺院之領于內外宣政院曰禪曰教曰律則固各守其業惟所謂白雲宗白蓮

宗者亦或頗通奸利云

武仁授受之際

成宗大德三年十二月命懷寧王哈尚出鎮漠北哈尚帝兄達爾瑪巴拉之長子母曰鴻吉哩氏同母弟曰阿裕爾巴里巴特喇

九年六月立子德壽為皇太子 十月帝不豫皇后秉政詔出阿裕爾巴里巴特喇與其母鴻吉哩氏出居懷州 十二月太子德壽卒

十年十二月阿裕爾巴里巴特喇至懷州所過郡縣供
帳華侈悉令撤去嚴飭扈從毋擾於民民皆感悅

十一年正月丙辰朔帝大漸免朝賀癸酉崩于玉德殿
皇后布爾罕以已嘗謀出阿裕爾巴里巴特喇及其母
居懷州至是恐其兄哈尚立必報前怨乃命召安西王
入京師欲立之左丞相阿固台平章賽音迪延齊瑪克新巴
延及諸王穆爾特穆爾陰左右之謀斷哈尚歸路奉皇
后垂簾聽政立安西王輔之於是固台以祔廟及攝位

事集廷臣議太常卿田忠良博士張昇曰制祔廟必書
嗣皇帝名今將何書御史中丞何瑋亦執不可阿固台
變色曰制自天降耶公等不畏死敢沮大事瑋曰死畏
不義耳苟死於義何畏議遂寢時右丞相哈喇哈斯叔
百司符印封府庫稱疾守宿掖門內旨日數至皆不聽
衆欲害之未敢發懷寧王適遣喀喇托克托計事京師
哈喇哈斯令亟還報復遣使南迎阿裕爾巴里巴特喇
懷州使至阿裕爾巴里巴特喇疑未行其傳李孟曰支

子不嗣世祖之典訓也今宮車晏駕大太子遠在萬里
殿下當急還宮庭以安人心阿裕爾巴里巴特喇乃奉
其母行先遣孟趨哈喇哈斯覘之適后使問疾哈喇哈
斯所孟入長揖引其手診之衆謂孟醫也竟不疑既而
知安西之變有日還報曰事急矣不可不早圖之阿裕
爾巴里巴特喇曰當以卜決之孟曰卜者謂曰大事待
爾而決第云其吉及入筮果吉孟曰筮不違人是謂大
同阿裕爾巴里巴特喇喜振袖而起衆翼之登騎諸臣

皆步從至漳河值大風雪田叟有以孟粥進者近侍却
不受阿裕爾巴里巴特喇曰漢光武嘗為寇兵所迫食
豆粥大丈夫不備嘗艱難罔知稼穡以致驕惰命取食
之賜隻綾一匹慰遣之 二月辛亥阿裕爾巴里巴特
喇至大都與母鴻吉哩氏入內哭盡哀復出舊邸安西
之黨見阿裕爾巴里巴特喇既至遂謀以三月三日偽
賀其生辰因以舉事哈喇哈遜聞之夜遣人啟阿裕爾
巴里特喇曰懷寧王遠不能猝至恐變生不測當先事

而發阿裕爾巴里巴特喇復遣都萬戶囊嘉特詣諸王
圖喇定計囊嘉特力贊之乃先二日三月丙寅率衛士
入內稱懷寧王遣使召安西計事至即并諸王穆爾特
穆爾執之鞠問詞服械送上都叔阿固台巴圖瑪克新
賽音延齊巴延等誅之諸王庫庫楚雅克呼都克進曰今
罪人斯得太子實世祖之孫宜早正大位阿裕爾巴里
巴特喇曰王何為出此言也彼奸人潛結宮闈亂我家
法故誅之豈欲作威福以覬望神器耶懷寧王吾兄也

宜正大位已遣使奉璽北迎之矣遂自監國與哈喇哈

斯日夜居禁中以備變俾李孟叅知政事孟損益庶務

裁抑僥倖羣小多不樂既而曰執政大臣當自天子親

用今鑒輿在道孟未見顏色誠不敢冒大任因辭弗許

遂逃去不知所之五月乙丑懷寧王哈尚至大都初

哈尚聞帝崩自阿勒坦山至和林諸王勲戚合詞勸進

王曰吾母及弟在大都俟宗戚畢會議之阿裕爾巴里

巴特喇既平內難其母鴻吉哩妃或於日者言欲哈尚

讓位於阿裕爾巴里巴特喇哈尚聞之語喀喇托克托
曰我捍邊陲十年又膺次居長星命之言茫昧難信設
我即位後所行上合天心下副民望則雖一日之短亦
足垂名萬年何可以陰陽家言而乖祖宗之托哉此殆
用事之臣擅權專殺恐他日或治其罪故為是奸謀耳
汝為我往察事機疾歸報我乃親帥大軍由西道諸王
鄂爾和由中道成格勒由東道各以勁卒一萬從而排
徊不進托克托馳至大都入道哈尚言妃愕然曰修短

之說雖出術家為太子周思遠慮乃我深愛今貪慈已
除宗王大臣議已定太子不速來何為汝所致言殆有
譏間汝歸為我彌縫之而趣其來先是妃以哈尚不至
復遣阿實克布哈迎之備道安西謀變始末及太弟監
國與諸王羣臣推戴之意至是托克托繼往行至中道
哈尚輿中望見之趣使同載托克托具述妃言懷寧王
大感悟至是至上都即以阿實克布哈為平章政事遣
還報兩宮阿裕爾巴里巴特喇即侍其母來會於上

都廢皇后已約特氏居東安殺之誅安西王阿南達及
諸王穆爾特穆爾 甲申懷寧王即位詔曰昔我太祖
皇帝以武功定天下世祖皇帝以文德洽海內列聖相
承正衍無疆之祚朕自先朝肅將天威撫軍朔方殆將
十年親御甲冑力戰却敵者屢矣方諸蕃內附邊事以
寧遽聞宮車晏駕廼有宗室諸王貴戚元勳相與定策
於和林咸以朕為世祖曾孫之嫡裕宗正派之傳以功
以賢宜膺大寶朕謙讓未遑至於再三還至上都宗親

大臣復請於朕間者姦臣乘隙謀為不軌賴祖宗之靈
母弟阿裕爾巴里巴特剌稟命太后恭行天罰內難既
平神器不可久虛宗祧不可乏嗣合詞勸進誠意益堅
朕勉徇輿情於五月二十八日即皇帝位任大守重若
涉淵永屬嗣服之云初其與民更始可大赦天下追尊
考曰順宗皇帝尊母鴻吉哩氏為皇太后加哈喇哈斯
達爾罕並太傅阿實克布哈太尉以塔海罕為丞相
成格勒奇塔特布濟克穆爾布哈並平章事 六月立弟阿

裕爾巴里巴特喇為皇太子受金寶 七月封圖喇為

越王左遷右丞相哈喇哈斯為和林左丞相初皇太子
入定內難阿固台有勇力人莫能近圖喇實手縛之以
功封越王哈喇哈斯力爭以為舊制非親王不得加一
字之封圖喇疎屬豈可以一日之功廢萬世之制帝不
聽圖喇因譖于帝曰安西謀于大統時丞相亦嘗署其
牘由是罷為和林行省左丞相

武宗至大二年八月置太子右衛率府命右丞相托克

托御史大夫布琳尼敦領府事取河南蒙古軍萬人課
之詹事王約曰左衛率府舊制有之今置右府何為諸
公深思之不可以累儲宮也太子又命取安西兵器給
宿衛士約謂詹事旺扎勒曰詹事移文千里取兵器人
必驚疑主上聞之奈何旺扎勒愧曰實慮不及此家令
薛居言陝西分地五事命往理之約不為署行語之曰
太子潛龍也當勿用之時為飛龍之事可乎遂止太子
喜諭羣下曰事未經王彥博者勿啟一日約方啟事二

宦官侍側太子問曰自古宦官壞人家國有諸對曰宦官善惡皆有之但恐處置失宜耳太子深然其言

三年正月徵李孟入見以為平章政事同知樞密院事初孟既逃去有譖于帝者曰內難初定時孟嘗勸皇太子自取帝弗之信一日太子侍宴忽戚然改容帝曰吾弟何不樂太子從容起謝曰賴天地祖宗神靈神器有歸然成今日母子兄弟之懽者李道復之功居多適思之不自知其變於色也帝即命搜訪之得於許昌陘山

召見謂宰臣曰此皇祖妣命為朕賓師者宜速任之至是乃授中書平章事集賢大學士同知樞密院事

四年正月癸酉朔帝不豫免朝賀庚辰帝崩于玉德殿三月庚寅皇太子即位詔曰惟昔先帝事皇太后撫朕眇躬孝友天至由朕得托順考遺體重以母弟之嫡加有削平內難之功於其踐祚曾未踰月授以皇太子寶領中書令樞密院百揆機務聽所總裁于今五年先帝奄棄天下勲戚元老咸謂大寶之承既有成命非與

前聖賓天而始徵集宗親議所宜立者比當稽周漢晉
唐故事正位宸極朕以國恤方新誠有未忍是用經時
今則上奉皇太后勉進之命下徇諸王勸戴之勤三月
十八日於大都大明殿即皇帝位可大赦天下初帝在
東宮宦者李邦寧乘間言於武宗曰陛下富於春秋皇
子漸長父作子述古之道也未聞有子而立弟者武宗
不悅曰朕志已定汝自往東宮言之邦寧慙懼而退及
帝即位左右咸請誅之帝曰帝王歷數自有天命其言

何足介懷加邦寧開府儀同三司

特們德爾之奸

武宗至大三年雲南行省左丞相特們德爾擅離職赴
闕尚書省奏奉旨詰問尋以皇太后旨赦之

仁宗皇慶元年三月中書右丞相特們德爾以病免先
是武宗崩帝在東宮以丞相三寶奴等變亂舊章誅之
用旺扎勒及李孟為中書平章政事銳欲更張政事而
皇太后在興聖宮已有旨台特們德爾為中書右丞相

踰月帝即位因遂相之及幸上都命特們德爾居守大都至是以病去職

延祐元年九月復以特們德爾為中書右丞相時右丞相哈克織自言非世勲族姓不可獨當國因舉特們德爾自代遂拜開府儀同三司錄軍國重事居數月復進右丞相以哈克織為左丞相特們德爾奏言前富民往諸蕃商販率獲厚利蕃貨日重請遣官置綱以征其貨私往者沒官又請預賣山東河間運使來歲鹽引及各

治鐵貨以足用又江南田糧雖嘗經理多未核實可始
自江浙以及江東西宜先事嚴限格令田主自實仍禁
勢豪毋得沮撓帝皆從之尋遣使者分行各省括田增
稅苛急煩擾江右為甚明年賴民蔡五九作亂南方騷
動詔罷其事五九尋伏誅

三年三月中書平章政事張珪罷時帝如上都皇太后
以張珪嘗劾特們德爾不可使為太師召珪切責杖之
珪創甚與歸時珪子景元宿衛左右以父病篤辭還帝

驚問故殊不憚遣使賜珪酒進拜大司徒遂謝病歸
四年六月特們德爾罷以哈克繼為右丞相特們德爾
之再入相恃勢貪虐尤穢滋甚中外切齒羣臣不知所
為平章政事蕭拜珠稍牽制之中丞楊多爾濟慨然以
糾正其罪為己任上都富民張弼殺人繫獄特們德爾
使家奴脅留守賀勝使出之勝不可多爾濟廉得特們
德爾受弼賂鉅萬萬乃與拜珠及勝奏之而內外御史
凡四十餘人共劾其桀黠姦貪欺上罔下占據晉王田

及衛兵牧地竊食郊廟供祀馬受諸王人等珍玉之賄
動以萬計誤國之罪又在阿哈瑪特僧格上四方憤嫉
咸願車裂斬首以快人心奏上帝震怒特們德爾懼逃
匿太后宮多爾濟持之益急太后召多爾濟責之帝不
忍傷太后意但罷其相位而遷多爾濟為集賢學士
六年四月特們德爾復起為太子太師中丞趙世延論
其不法數十事併內外臺劾其不可輔導東宮者又四
十餘人帝以太后故皆不聽

七年正月帝崩太后以特們德爾為中書右丞相 二

月殺平章蕭拜珠御史中丞楊多爾濟特們德爾既相

以二人嘗攻其姦惡必欲報之遂以太后旨召二人至

徽政院與徽政使實勒們御史大夫圖圖爾布哈雜問

之罪以違太后旨多爾濟曰中丞之職恨不即斬汝以

謝天下果違太后旨爾豈有今日耶特們德爾又引同

時御史二人證其罪多爾濟唾之曰汝等備員風憲為

是徇姦事耶坐者皆慙俯首特們德爾即起入奏未幾

傳旨執二人載諸國門外殺之並籍其家是日風沙晦

冥都人沟沟道路相視以目後欲奪多爾濟妻劉氏與

人劉剪髮毀容自誓乃免時特們德爾日思報復讐怨

誅戮不已左丞張思明謂曰山陵甫畢新君未立丞相

恣行殺戮人皆謂陰有不臣之心萬一諸王駙馬疑而

不至奈何不可不熟慮也衆皆危之特們德爾稍悟曰

非左丞言幾誤吾事三月太子即位特們德爾進開

府儀同三司上柱國太師左遷前中書平章李孟為

集賢侍講學士特們德爾以孟初不附己欲因其不就
陰中之孟拜命欣然帝謂特們德爾子巴爾濟蘇曰爾
輩謂孟不肯為是官今何如由是無敢言 五月殺上
都留守賀巴延特們德爾怨巴延嘗發張弼之獄乃奏
其便服迎詔為不敬殺之籍其家 八月下四川平章
政事趙世延獄初世延既解中丞出為四川平章特們
德爾猶以世延劾其姦誣怨之不己屬其黨誘世延從
弟索約爾哈呼誣告之逮世延置對既遇赦猶鍛鍊成

獄請置極典并究省臺諸臣帝不允謂近侍曰頃特們德爾必欲置趙世延於死地朕素聞其忠良故每奏不納左右咸稱萬歲

英宗至治二年八月特們德爾死特們德爾自復相以來恃其權寵乘間肆毒睚眦之私無有不報帝覺其所譖毀者皆先帝舊人滋不悅其所為乃任左丞相拜珠委以心腹由是特們德爾漸見疎外因稱疾不出及聞拜珠奉旨往立其祖安圖碑於范陽將復涖省事入朝

至內帝聞其來遣人止之遂快快而死

三年五月監察御史蓋繼元宋翼言特們德爾奸貪負國生逃顯戮死有餘辜乃命毀所立碑併追奪官爵籍沒其家

晉邸之立

英宗至治三年八月御史大夫達實執帝于南坡及右丞相拜珠初特們德爾既奪爵籍產達實等以奸黨不自安帝在上都夜寐不寧命作佛事拜珠以國用不足

諫止之既而懼誅者復陰誘羣僧言國當有厄非作佛

事大赦無以禳之拜珠叱曰爾輩不過圖得金帛而已

又欲庇而罪耶奸黨聞之益懼乃生異謀至是帝自上

都南還駐蹕南坡是夕達實與知樞密院事額森鐵穆

爾諸王諳達布哈等謀逆以達實所領阿蘇衛兵為外

應達實先與前平章政事齊勤特穆爾殺右丞相拜珠

而達實直犯禁幄手執帝於卧所時年二十一帝性剛

明嘗以地震避殿徹樂減膳近臣有稱觴賀者叱曰朕

方修德不暇汝為大臣不能匡輔反為諂耶拜珠進曰

咎在臣等宜求賢自代帝曰無多遜朕之過也嘗謂宰

執曰中書選人署事旬日御史臺即改除之臺除者中

書亦然今山林儒逸良多卿等不能盡心求訪惟以親

戚故舊更相引用耶其明斷多類此然以果於刑戮奸

黨畏誅遂構大變云 諸王諸達布哈及額森特穆爾

奉璽綬迎晉王伊蘇特穆爾于北邊伊蘇特穆爾者裕

宗之孫晉王噶瑪拉長子也襲封晉王仍鎮北邊初王

府內史都爾蘇得幸於王嘗偵伺朝廷事機以其子哈克繼事丞相拜珠得入宿衛久之哈克繼知達實欲傾害拜珠遂脫歸是年三月宣徽使塔坦來王邸為都爾蘇言王上將不利於晉王由此二人深相要結八月二日達實密遣烏魯斯來告曰我與哈克繼額森特穆爾實達爾謀已定事成推立王為皇帝又以告都爾蘇曰汝與瑪蘇庫知之勿令舒瑪爾節得聞也於是王命囚烏魯斯遣布珠默色赴上都以密謀告變未至帝遇弒

於是諸王諸達布哈及額森特穆爾奉皇帝璽綬來迎
九月晉王即皇帝位於龍居河大赦天下以額森特
穆爾為右丞相都爾蘇為中書平章政事達實知樞密
院事時諸王瑪努勒言于帝曰不誅元凶則陛下善名
不著天下後世何由而知陛下心帝深然之十月遣
使至大都以即位告天地宗廟社稷誅逆賊額森特穆
爾旺扎勒圖們等於行在所以舒瑪爾節為中書右丞
相寧珠為御史大夫遣入京師收達實及其黨齊勒特

穆爾等悉誅之戮其子孫籍沒家產為特們德爾子索諾木議遠流張珪曰索諾木從逆賊親斫丞相拜珠臂乃欲活之耶十一月帝至大都十二月御史臺經歷多爾濟巴勒御史徹爾達罕烏德美額森呼圖克並坐黨達實免官於是監察御史趙成慶等言特們德爾在先朝包藏禍心離間親藩誅戮大臣使先帝孤立卒罹大禍其子索諾木親與逆謀久逃天憲乞正其罪以快元元之心伊喇圖圖哈布哈薩敦皆達實之黨不宜

寬宥遂並伏誅 流諸王伊埒特穆爾于雲南詣達布
哈于海南吹布哈于尼嚕罕博囉烏魯斯布哈于海島
並坐與達實逆謀 時舒瑪爾節等言南坡之變諸王
瑪努勒逃赴潛邸願効死力且請誅戮元凶上契宸衷
嘗蒙獎諭今臣等議宗戚之中能自拔逆黨盡忠朝廷
者惟有瑪努勒請加封賞以示激勸遂以泰寧縣三千
戶封瑪努勒為泰寧王 議討逆功以都爾蘇為左丞
相寧珠索多並加光祿大夫賜舒瑪爾節等金有差

詔改明年元為泰定

三帝之立

明宗文宗
順帝

仁宗延祐二年十二月立武宗子和實拉為周王出鎮雲南初武宗既立帝為太子後丞相三寶努復勸立和實拉召喀喇托克托言之托克托曰太弟定宗社居東宮已久兄弟叔侄世世相承孰敢紊其序乎三寶努曰今日兄已授弟異日能保叔授其侄乎托克托曰在我不可渝彼失其信天實鑒之至是議立太子特們德爾

欲固位取寵乃請立皇子碩迪巴拉又與太后幸臣實勒們譖和實拉於兩宮遂封為周王遣出鎮雲南

三年三月置周王常侍府官屬以圖古勒鄂爾多尚嘉努博囉嘉琿等為之十一月周王和實拉次延安其

臣圖古勒尚嘉努及武宗舊臣喇實沙卜丹哈巴爾圖等皆來會嘉琿謀曰天下者我武宗之天下也王之出鎮本非上意由左右讒構致然請以其故白行省俾聞之朝廷庶可杜塞離間不然事變叵測遂與數騎馳去

先是阿斯罕為太師特們德爾奪其位出之為陝西行
省丞相及嘉琿等至即與平章政事塔齊爾行臺御史
大夫圖加卜中丞托歡悉發關中兵分道自河中府入
已而塔齊爾托歡襲殺阿斯罕嘉琿于河中和實拉遂
西行至北邊金山西北諸王察克台等聞和實拉至咸
率衆來附和實拉至其部與定約束每歲冬居北延夏
居阿魯噶克山春則命從者耕于野泥十餘年間邊境

寧謐

英宗至治元年五月遷武宗第二子圖卜特穆爾于瓊
州時右丞相特們德爾懷私固寵構累骨肉諸王大臣
莫不自危中政使約爾珠告托歡徹爾等交通親王於
是徙圖卜特穆爾居海南因禁日者每交通諸王駙馬
掌陰陽五科者毋泄占候

泰定帝泰定元年正月召圖卜特穆爾于瓊州 十月
封圖卜特穆爾為懷王居建康

致和元年是年九月文宗即位改元天歷三月徙懷王

圖卜特穆爾于江陵 七月帝崩于上都年三十六葬
起輦谷稱為泰定帝

王禕曰武宗以兄弟相及約繼世子孫迭居大位而
仁宗惑於儉言不守宿諾傳位英宗仍使武宗二子
明宗文宗出居於外及英宗遇弒而明宗在北文宗
在南晉邸乘間入繼大統或謂晉邸非所宜立雖然
晉王於世祖孫也於次為長雖守藩服嘗有盟書今
而國統之弗繼則求所當立者舍晉王之系將誰屬

耶然則謂晉邸非所宜立者亦過也舊傳英宗之弑晉
邸與聞之故其歿不舉請諡升祔之典明其為賊也
然考之實錄皆不得其實傳聞之謬烏可信哉

初帝由晉邸立而和實拉兄弟以武宗子播越南北人
心念之僉樞密院事雅克特穆爾自以身受武宗寵拔
之恩謀欲立其二子乘帝有疾與諸王滿都等陰圖其
事至是帝崩皇后皇太子遣使詣大都命平章政事額
卜德呼勒奴掌百司印章及諭安百姓 八月甲午百

官集興聖宮雅克特穆爾率阿拉克特穆爾博囉齊等
十七人兵皆露刃號於衆曰武宗皇帝有子二人天下
正統當歸之敢有不順者死遂手縛平章額卜德埒勒
巴延徹爾分命勇士執中書左托多朵參政王士熙參
議托克托吳秉道侍御史特默格丘世傑太子詹事丞
王桓等皆下獄雅克特穆爾與西安王喇特納錫哩
共守內庭推前湖廣行省左丞相拜布哈為中書左丞
相詹事達實哈雅為中書平章蘇蘇為左丞王布琳濟

達為樞密副使與中書右丞趙世延等分典庶務調兵
守禦關要徵諸衛兵屯京師下郡縣造兵器出府庫犒
軍士雅克特穆爾直宿禁中達旦不寐一夕再徙人莫
知其處是時周王和寶拉遠在沙漠猝未能至慮生他
變乃遣前河南叅政明埒克棟阿迎懷王圖卜特穆爾于
江陵密以意諭河南行省平章巴延令簡兵以備扈從
且令達實特穆爾矯為南使言懷王已次近郊使民無
驚疑已亥明埒克棟阿至汴梁與巴延合謀執行省臣

皆下之獄 癸卯巴延殺平章奇魯及右丞拜特木兒

是日明將克棟阿等至江陵甲辰懷王發江陵遣使召鎮南威順高昌諸王來會執湖廣行省左丞瑪哈謀送京師以博索代之河南行省出府庫金銀鈔錠分給官吏將士又命有司造乘輿供張儀仗等物平章巴延勒兵以俟叅政圖卜台獨曰今蒙古軍與宿衛之士俱在上都而令特默齊軍守諸隘吾恐此事之不可成也是夜圖卜台將手刃殺巴延巴延覺遂拔劒殺圖卜台而奪

其所部軍器馬足 丁未雅克特穆爾遣其弟薩敦守

居庸關子騰吉斯屯古北口戊申雅克特穆爾又令奈

曼台矯為使者北來言周王亦整兵南行聞者皆悅懷

王命已延為河南行省左丞相遣博囉等將兵守潼關

己酉丞相都爾蘇殺諸王滿都於上都滿都時與阿

穆爾台宗正札爾固齊庫庫楚平章瑪魯集賢學士烏

魯斯布哈大常禮儀院使哈克齊等十八人同附雅克

特穆爾事覺被殺 庚戌懷王至汴梁已延等扈從北行

以前翰林學士鄂博哈雅為河南行省平章事辛亥以

雅克特穆爾知樞密院事 壬子托克托穆爾帥其軍

自上都來歸即命守古北口 癸丑上都諸王以兵分

道攻大都 乙卯托克托穆爾及上都諸王實喇平章

奈曼台詹事奇徹戰于宜興斬奇徹于陣禽奈曼台送

京師戮之實喇敗走 丁巳懷王入京師居大內以明

埒克棟阿庫庫台蘇蘇並為平章政事曹立為右丞己延

為御史大夫趙世延為御史中丞高昌特穆爾布哈知

樞密院事 己未上都梁王旺沁右丞相達實特穆爾

太尉布哈平章政事瑪魯御史大夫寧珠等兵次榆林
隆鎮衛指揮哈哈謀附上都生棄市 是月都爾蘇立

泰定帝子刺實晉巴為帝于上都年九歲改元天順 九

月庚申朔雅克特穆爾督師居庸關遣薩敦以兵襲上

都兵于榆林擊敗之追至懷來而還隆鎮衛指揮烏德

美以兵襲上都諸王穆爾特穆爾特默齊于陀羅臺執

之歸于京師 壬戌懷王遣使祭五嶽四瀆命蘇蘇宣

論中外曰昔在世祖以及列聖臨御威命中書省綱維百司總裁庶政凡錢穀銓選刑罰興造罔不司之自今除樞密院御史臺其餘諸司及左右近侍敢有隔越中書奏請者以違制論監察御史其糾言之賜上都將士來歸者鈔各有差名雅克特穆爾赴闕上都諸王額森特穆爾等自遼東以兵入遷民鎮丁卯雅克特穆爾率諸王大臣請懷王早正大位以安天下王以兄周王和實拉在漠北欲虛位俟之雅克特穆爾曰人心何背

之機間不容髮一或失之噬臍無及王曰必不得已當
明吾志播告天下 己巳上都諸王呼喇台等引兵入

崞州遣薩敦拒遼東兵于薊州東流沙河教拉守居庸
關以伊蘇岱爾知行樞密院事將兵行視太行諸關西

擊河中潼關軍 辛未殺額卜德呼勒流托多王士熙

巴延徹爾托歡等于遠州並籍其家 壬申懷王即皇

帝位于大都詔曰洪惟我太祖皇帝混一海宇爰立定
制以一統緒宗親各受分地勿敢妄生覬覦此不易之

成規萬世所共守者也世祖之後成宗武宗仁宗英宗以公天下之心以次相傳宗王貴戚咸遵祖訓至於晉邸具有盟書願守藩服而與賊臣達實額森特穆爾等潛通陰謀冒干寶位使英宗不幸罹于大故朕兄弟播越南北備歷艱險臨御之事豈獲與聞朕以叔父之故順承惟謹于今六年災異迭見權臣都爾蘇額卜德呼勒等專權自用疎遠勲舊廢棄忠良變亂祖宗法度空府庫以私其黨類大行上賓利於立幼顯操國柄用成

其姦宗王大臣以宗社之重統緒之正協謀推戴屬于
眇躬朕以菲德宜俟大兄固讓再三百僚耆老以為神
器不可以久虛天下不可以無主周王遼隔朔漠民庶
皇皇已及三月誠懇迫切朕姑從其請謹俟大兄之至
以遂朕固讓之心已於致和元年九月十三日即皇帝
位于大明殿其以致和元年為天曆元年可大赦天下
於戲朕豈有意於天下哉重念祖宗開創之艱恐隳大
業是以勉徇輿情尚賴爾中外文武臣僚協心相與輯

享億兆以成治功咨爾多方體予至意癸酉封雅克

特穆爾為太平王乙亥上都旺沁兵襲破居庸關將

士皆潰雅克特穆爾軍次三河丙子旺沁游兵至大

口雅克特穆爾還軍次榆河帝出齊化門視師丁丑

雅克特穆爾來見曰乘輿一出民心必驚軍旅之事臣

請以身任之帝即日還宮戊寅雅克特穆爾與旺沁

前軍戰于榆河敗之追奔紅橋北其樞密副使阿拉克

特穆爾指揮使呼圖克特穆爾復以兵會旺沁來戰又

敗之 辛巳雅克特穆爾與上都軍大戰于白浮之野
敗之明日大霧旺沁等遁崑山奴集散亡復來戰雅克
特穆爾列陣白浮西敵不敢犯至夜薩敦托克托穆爾
前後夾攻敗走之追及于昌平北斬首數千級降者萬
餘人帝遣使諭雅克特穆爾曰丞相每臨陣躬冒矢石
脫有不虞奈何自今第以大將旗鼓督戰可也雅克特
穆爾對曰凡戰臣必以身先之敢後者論以軍法若委
之諸將萬一失利悔將何及 乙酉上都兵入古北口

將士皆潰其知樞密院竹準台以兵掠石槽雅克特穆爾先遣薩敦倍道趨石槽掩其不備擊之自將大軍繼其後轉戰四十餘里至牛頭山擒駙馬博羅特穆爾政事蒙古達實特穆爾等殺之將校降者萬人餘軍奔竄夜遣薩敦出古北口逐之托克托穆爾與遼東兵戰薊州南殺獲無算 丁亥遼東軍抵京城雅克特穆爾引兵拒之令京城台募壯丁乘城拒守 戊子上都雅克特穆爾呼喇台等兵入紫荆關將士皆潰陝西行臺御

史大夫額森特穆爾兵從大慶關渡河擒河中府官殺之萬戶徹爾特穆爾軍潰而遁河東官吏皆棄城走

十月己丑雅克特穆爾引兵至通州擊遼東軍敗之遣托克托穆爾將兵四千西援紫荆關 癸巳上都諸王

呼喇台游兵進逼南城雅克特穆爾陽翟王太平國王多羅台等戰于檀子山之棗林殺太平死者蔽野餘皆宵遁 乙未雅克特穆爾等師軍循北山而西趨良鄉時諸將與呼喇台阿拉克特穆爾等戰于盧溝橋聲言

雅克特穆爾大軍至敵兵皆遁 丙申中書省臣言上
都諸王大臣不思祖宗成憲惑於都爾蘇之言輒以兵
犯京畿賴陛下神武旺沁遂致潰亡生擒諸王博囉特
穆爾及諸用事臣蒙古達實等既已明正典刑宜傳首
四方以示衆從之 戊戌諸將追阿拉克特穆爾等至
紫荆關獲之送京師皆棄市 己亥特們德爾軍復入
古北口雅克特穆爾引兵禦之大戰于檀州南敗之特
們德爾走還遼東

辛丑齊王伊噶特穆爾蒙古元師布哈等以兵圍上都
都爾蘇等奉皇帝璽出降梁王旺沁遁遼王托克托為
齊王伊噶特穆爾所殺遂收上都諸王符印喇實晉巴不
知所終

丘濬曰泰定帝乃裕宗之嫡孫噶瑪巴拉之長子於屬
為宗子非不當立也英宗為達實所弑諸王迎立之
初不與其謀武宗二子次雖當立然既為英宗所據
則非其有矣泰定初立之年即立喇實晉巴為太子至

是五年名分已定圖卜特穆爾遣兵攻之以致于死
地史不明言其所以致死之由然所以致之死地者
圖卜特穆爾也律以春秋趙盾之法非弑而何

丁未陝西兵至鞏縣黑石渡遂據虎牢復入武關 庚
戌帝御興聖殿諸王大臣奉上皇帝寶分遣使者檄行
省內郡罷兵 甲寅元帥伊遜公爾執湘寧王巴拉實
哩送京師初巴拉實哩及趙王滿濟勒罕諸王呼喇台
承上都之命各起所部兵南侵冀寧還次馬邑至是被

執十一月辛酉額森魯兵至武安額森特穆爾以軍

降甲子陝西兵進逼汴梁聞朝廷傳檄罷兵乃解去

甲戌遷恭定后翁吉喇特氏于安東州庚辰遣使

奉迎周王和實拉于漠北癸未都爾蘇旺沁茂穆蘇

寧珠薩勒迪默色額森特穆爾等俱棄市十二月甲

寅復遣治書侍御史薩勒迪等迎周王時諸王皆勸周

王南遷京師周王遂發北邊諸王察克台元帥圖烈納

等咸帥師扈行舊臣博囉尚嘉努哈瑪爾圖皆從至金

山嶺北命博囉如京師

二年正月庚申遣前翰林學士承旨布達實哩北還周
王行在所仍命大府太監實喇卜奉金幣以往 乙丑
復遣中書左丞伊埒特穆爾迎周王 壬午周王遣博
囉至京師 乙酉薩勒迪等見周王於行帳勸進 丙
戌周王即皇帝位於和寧之北遣薩勒迪還京師命之
曰朕弟翼嘗觀書史通者得無廢乎聽政之暇宜親賢
士大夫講論史籍以知古今治亂得失卿等至京師當

以朕意諭之舊臣及兩宮之人聞北使至皆歡呼曰吾天子真自北來矣爭先迎謁所至成聚 二月辛卯立

妃鴻吉哩氏為皇后 辛丑追尊周王母伊奇哩氏母

唐古氏並為皇后 辛亥帝勅羣臣曰薩勒廸還言大

兄已即皇帝位凡二月二十一日以前除宮者速與制

勅後凡銓選其詣大兄行在以聞 三月辛酉帝遣雅

克特穆爾奉皇帝寶于行在所 四月癸巳雅克特穆

爾見于行在所行在嘉其功拜為太師復諭之曰凡京

師百官朕弟所用者並仍舊其諭以朕意雅克特穆爾
因奏陛下君臨萬方國家大事所繫者中書省臣樞密
院御史臺而已宜擇人居之遂以武宗舊人哈瑪爾圖
為中書平章政事拜特穆爾知樞密院事博羅為御史
大夫 甲午立行樞密院命昭武王知院事和斯賽音
特穆爾瑪努勒同知院事是日宴諸王大臣于行殿因
諭臺臣曰太祖有訓美色名馬人皆悅之然方寸一有
係累即能壞名敗德卿等居風紀之司亦當念此手世

祖初立御史臺首命塔齊爾博克達濟勒二人協司其政
天下國家譬如一人之身中書則右手也樞密則左手
也左右手有疾治之以良醫省院闕失不以御史臺治
之可乎凡諸王百司違法越禮一聽舉劾風紀重則貪
墨懼猶斧斤重則入木深其勢然也朕有闕失卿等亦
宜以聞朕不爾責 癸卯行在遣使立帝為皇太子
己未皇太子遣翰林學士承旨阿拉克特穆爾覲于行
在 乙亥行在勅大都省臣鑄皇太子寶時求故太子

寶不知所在乃命更鑄之 丁丑皇太子發京師北迎

行在 六月丁亥行在次琨都楞鄂布爾遣近侍拜布

哈至京師 庚戌皇太子次于上都之六十店辛亥行

在次哈喇哈納圖詔諭中書省臣凡國家錢穀銓選諸

大政事先啟皇太子然後以聞 八月乙酉行在次于

翁郭察圖丙戌皇太子入見是日行在宴皇太子及諸

王大臣于行殿 庚寅帝暴崩于行在皇太子入臨哭

盡哀雅克特穆爾以行在皇后之命奉皇帝寶授于皇

太子

胡粹中曰聞之故老言雅克特穆爾奉上璽綬明宗從官有不為之禮者雅克特穆爾且怒且懼既而帝暴崩雅克特穆爾聞哭聲即奔入帳中取寶璽扶文宗上馬南馳本史乃言皇太子入哭盡哀雅克特穆爾以皇后命奉皇帝寶授于太子其說不合宣當時忌諱有不敢明言者歟

癸巳皇太子至上都已亥皇太子復即位于上都大赦

天下以巴延為左丞相奇徹台阿爾斯蘭哈雅趙世延
並為平章政事達哩為右丞鄂屯趙世安並叅知政事
達實特穆爾知樞密院特穆爾布哈特穆爾圖並御史
大夫 九月丁巳帝還大都 十月丙申上太行皇帝
尊諡廟號明宗

至順元年三月封皇子喇特納達喇為燕王 四月
皇后鴻吉哩氏殺明宗皇后班布爾錫 五月廢明宗
子托歡特穆爾時帝將立其子喇特納達喇為皇太

子乃以托歡特穆爾乳母夫言明宗在日素謂太子非其子黜之江南驛召翰林學士阿拉克特穆爾奎文閣大學士和塔拉都哩默色書其事于托卜齊雅又召虞集使書詔播告中外十二月立燕王喇特納達喇為皇太子

二年正月皇太子喇特納達喇卒八月詔太子古嘈達剌納出居雅克特穆爾家十一月詔養雅克特穆爾之子塔喇海為子

三年八月帝崩于上都廟號文宗 十月庚子郕王伊

埒哲伯即皇帝位王明宗第二子也帝始崩時雅克

特穆爾請皇后立皇子雅克托果斯后不從命立郕王

時年甫七歲百司庶務咸啟皇后取進止 十一月戊

寅尊皇后為皇太后 壬辰郕王薨廟號寧宗 皇太

后遣右丞奇爾濟蘇迎托歡特穆爾既廢徙高麗使居

大青島後又徙靜江至是郕王薨雅克特穆爾復請立

雅克托果斯皇太后曰吾子尚幼托歡特穆爾在廣西

今年十三矣且明宗長子於理當立乃遣奇爾齊蘇往迎之

三年六月順帝元統元年三月雅克特穆爾死雅克特穆爾自秉權以來肆行無忌一宴或宰十三馬取泰定后為夫人前後尚宗室女四十人有交禮三日遽遣歸者後房充斥不能盡識一日宴趙世延宅男女列坐見座隅一婦甚麗意欲與俱歸顧左右曰此為誰對曰太師家人也自後荒淫日甚體羸溺血而死 六月己巳

托歡特穆爾即皇帝位于上都初帝自廣西迎至百官

具鹵簿迎于良鄉雅克特穆爾既見並馬徐行具陳迎

立之意帝畏之一無所答雅克特穆爾疑其意不可測

故至京久不得立適太史亦言其立則天下亂用是議

未能決遷延者數月至是雅克特穆爾死皇太后乃與

大臣定議立之且約後當傳于雅克托果斯若武宗仁

宗故事 七月立雅克特穆爾女巴約特氏為皇后

八月奎章閣侍書學士虞集謝病歸帝之將立也召諸老

臣赴上都議集亦預焉中丞馬祖常使人告集曰御史有言矣蓋以文帝常命集書詔言帝非明宗子故祖常以此諷集使去集乃謝病歸集既去侍臣有以舊詔言者帝不懌曰此我家事豈由彼書生耶不問

後至元元年六月左丞相騰吉斯伏誅遂殺皇后巴約特氏騰吉斯雅克特穆爾子也時右丞相巴延獨秉政騰吉斯忿曰天下本我家天下已延何人而位吾上遂與其叔父句容郡王達蘭達哩潛畜異心謀立諸王鴻

和特穆爾帝數召達蘭達哩不至鄧王蘇蘇勒圖發其
謀騰吉斯伏兵東郊率勇士突入宮已延及旺札勒特穆
爾等掩捕獲之併殺其弟塔喇海時塔喇海走匿皇后
座下后蔽以衣左右曳出斬之血濺后衣已延使人併
執后后呼帝曰陛下救我帝曰汝兄弟為逆豈能相救
乃遷后出宮已延殺之于開平民舍鴻和特穆爾亦自
殺詔曰曩者文宗皇帝以雅克特穆爾嘗有勞伐父子
兄弟顯列朝廷而輒造事釁出朕遠方文皇尋悟其妄

有旨傳次于朕雅克特穆爾貪利幼弱復立朕弟伊埒
哲伯又不幸崩殂今丞相巴延追奉遺詔迎朕于南既
至大都雅克特穆爾猶懷兩端遷延數月天殞厥躬已
延等同辭翊戴乃正宸極後薩敦達哩騰吉斯等相襲
用事交通宗王鴻和特穆爾圖危社稷阿雅噶齊亦嘗
與謀賴巴延等以次掩捕明正其罪元兇構難貽我皇
太后震驚朕用兢惕永惟皇太后後其所生之子一以
至公為心親挈大寶畀余兄弟迹其定策兩朝功德隆

盛近古罕比雖嘗奉上尊號揆之朕心猶為未盡已命大臣特議加禮已延為武宗捍禦北邊珣戴文皇茲又克清太憖明勅圖憲爰賜達爾罕之號至於子孫世世永賴可大赦天下 八月尊皇太后為太皇太后


六年六月詔廢文宗廟主遷太皇太后鴻吉哩氏于東安州安置放雅克托果斯于高麗詔曰昔武帝升遐太后惑于憊慝俾皇考出封雲南英宗遇害我皇考以武宗之嫡遠居沙漠親王大臣同心珣戴于時以地近先

迎文宗暫總機務繼知天理人倫所在假讓位之名以
實璽來上皇考推誠不疑即立為皇太子文宗當躬迓
之際乃與其臣伊埒布哈額哩葉明埒克棟阿等謀為不
軌使我皇考飲恨上賓歸而再御宸極又私圖傳子乃
構邪言嫁禍于班布爾錫皇后謂朕非明宗之子遂俾
出居遐陬內懷愧嫌則殺額哩葉以杜口上天不祐遂
降殞罰叔孀布達實哩怙其勢焰不立明考之冢嗣而
立幼稚之弟伊埒哲伯奄復不年諸王大臣以賢以

長扶朕踐祚賴天之靈權奸屏黜永惟鞠育罔極之恩
忍忘不共戴天之義其命太常撤圖卜特穆爾在廟之
主布達實哩削去太皇太后之號徙東安州安置雅克
托果斯放諸高麗當時賊臣伊埒布哈額哩葉已死其
以明埒棟阿等明正典刑時監察御史崔敬言文皇獲
不執之愆已撤廟祀叔母有階禍之罪亦削鴻名盡孝
正名斯亦足矣惟念皇弟雅克托果斯年方在幼罹此
播遷天理人情有所不忍方明皇上賓皇弟方在襁褓

未有知識義當矜憫伏望陛下迎歸太后母子以盡骨肉之義不報未幾太后殂于東安州雅克托果斯遇害于中道

元史紀事本末卷三



總校官舉人 且 章維桓

校對官編修 且 高棫生

謄錄監生 且 楊 鯤